



# STINAPA TA INFORMA

Kon nos por frena kresementu di e seru di sushi?  
Resiklahe Util....

Den e artíkulo anterior bo por a lesa ku por frena e kresementu di e 'seru di sushi' dor di evitá di krea sushi. E di dos paso ta uso di nobo (resiklahe) di kosnan i materialnan. Ora ta resiklá produktonan usá, ta redusí e volúmen di sushi ku mester hiba *landfill* i konsekuentemente mester di ménos lugá pa depositá sushi. Den e maneho di sushi di Antia (afvalbeleid van de Nederlandse Antillen) nos por lesa ku ta preferá di resiklá hinter e produkto (por ehèmpel bôter di glas) na lugá di e material (glas). Lástimamente no por hasi uso di tur posibilidat riba un isla chikitu manera Boneiru. E isla sus skal ta demasiado chikitu pa por paga pa tur fasilidat di resiklahe. P'esei nos mester hasi lokual ku por i wak kiko por hasi den kuadro di resiklahe. Ora bo kumpra un kaha di serbes bo sa kòrda ku kada bôter ta resultá den baki di sushi? No tin depósito riba dje, pues no ta yen'é di nobo. Pa resiklá produkto tirá afó, mester kolektá nan separá. Riba dűmp na Lagun pa algun tempu kaba ta tene heru bieu, manera outo, na un lugá separá. Desde poko tempu ta depositá glas tambe na un lugá separá. Pa siman ta kolektá alrededor di 5880 kilo di glas ku ta nifiká 306 tonelada pa aña. Ta resiklá e glas akí probablemente dor di pas'é den *crusher* i uz'é den konstrukshon di kaya. Kisas bo a ripará ku kasi tur negoshi di Horeca tin kòntainer hel. Nan ta partisipá aktivamente den kolekshon di glas. Habitantenan por entregá nan glas bieu na e garashi di Selibon banda di Bonaire Warehouse. Selibon ta lucha pa den futuro serkano por kolektá otro material pa resiklá, manera bleki, bôter di plèstik i papel. Banda di kolekshon separá tin otro manera pa praktiká resiklahe, manera;

\*Drecha ( òf laga drecha) artíkulonan bieu òf dañá na lugá di benta nan afó.

\*Kumpra artíkulonan segundo mano.

\*Usa sakunan di plèstik mas ku un biaha, òf mas mihó ainda: kumpra un bon tas pa hasi kompra i bai tienda ku esei.

\*Ora ta usa papel, usa tur dos banda i kumpra papel resiklá.

\*Otro forma di resiklahe creativo, manera warda material pa skol nan (ròl di karton di papel di baño, karton).

Na Afrika e hendenan ta tremendo den resiklahe. Einan nan ta traha lampi di kerosin di bleki bieu i outo di hunga pa e muchanan. Produkto nobo no mester ta mihó ku un produkto resiklá. Bo por duna bo kosnan un aparensa nobo-nobo masha simpel. Djis pensa riba drechamentu di un stul, un tiki fèrf nobo i furu nobo por hasi un stul meskos ku nobo. Duna bo kreatividat kaminda habrí. Dios sa ki kos bunita por resultá di esei.... i e ta yuda di tene e seru di sushi di Boneiru mas chikitu!  
*Skirbí pa Ellie Noij, tradusí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURELESA



**Traha huntu na un desaroyo duradero pa Boneiru**